

Adhurimi Eukaristik



Barí sipas zemrës së Krishtit!

*Katedralja e shën Palit
Tiranë*

**NË EMËN TË ATIT E TË BIRIT E TË SHPIRTIT SHEJT.
AMEN.**

Vllazën e motra, jena këtu në gjuj të gjithë bashkë për me soditë fytyrën e Krishtit në Eukaristi. Ta përgatisim zemrën tonë që të mund ta sodisim sa ma mirë në atë Oste Bariun e Mirë, Bariun i cili na e hapë derën e zemrës së Tij për me na pranue në gëzimin dhe në paqen e tij që nuk kanë fund asnjëherë.

E ndërsa do t'i mbajmë sytë e ngulun në Atë i cili e ka dhanë dhe e jep jetën e tij për ne, të lutemi në këtë adhurim eukaristik edhe për Arqipeshkvin tonë Imzot Gjergjin, që të jetë bari në mesin tonë sipas zemrës së Bariut të mirë, dhe këtë ta bajmë duke lartësue drejt elterit parfumin e lutjeve tona dhe jo të paragjykimeve tona, duke pasë parasysh se të gjithë të krishtenët janë të thirrur për me kenë meshtarë, profetën dhe mbretën.

Të gjithë jena të thirrur për me kenë “barij të mirë” që e japin jetën për tjetrin. me dhanë jetën për tjetrin don me thanë edhe me u angazhue për tjetrin, me i dhurue kohë atij që të kërkon kohë, me i dhanë forcë atij që asht i dobët, me bashkëpunue me atë që asht i vetëm; e gjithë kjo merr një emën tjetër që quhet “aktivitet baritor”. në këtë mënyrë t'i kërkojmë Zotit në Eukaristi që të gjithë të jena bashkëpunëtorë në këtë aktivitet baritor dhe jo vetëm përfitues të veprimt baritor të të tjerëve!!!

Aleluja, Aleluja

Unë jam Bariu i mirë: i njoh të miat dhe ato më njohin mua.
Sikurse Ati më njeh mua dhe unë e njoh Atin edhe jetën e jap për dele.

Aleluja, Aleluja

Prej Ungjillit sipas shën Gjonit (Gjn 10,11-18)

Në atë kohë, Jezusi tha: Unë jam Bariu i mirë.

Bariu i mirë e jep jetën e vet për dele.

Rrogëtari që s'është bari, të cilit nuk i përkasin dhentë kur sheh se po vjen ujku lë dhentë e ikën e ujku i rrëmben dhe i shpërndan: është rrogëtar dhe s'është në kujdes për dhen.

Unë jam Bariu i mirë: i njoh të miat dhe ato më njohin mua.

Sikurse Ati më njeh mua dhe unë e njoh Atin edhe jetën e jap për dele.

Kam edhe të tjera dele, që nuk janë të kësaj vathe.

Edhe ato më duhet t'i bashkoj dhe do ta dëgjojnë zërin tim, do të bëhet një grigjë e vetme e një Bari i vetëm.

Prandaj edhe më do Ati, sepse e jap jetën time që ta marr përsëri.

Askush nuk mund të ma marrë: por unë e jap prej vetes.

Kam pushtet ta jap jetën e kam pushtet ta kthej prapë atë.

Këtë urdhër e mora prej Atit tim.

Fjala e Zotit

Heshtje e shkurtë meditimit

Hyji nuk e braktisë kurrë grigjën e tij, por, nëpërmjet Apostujve dhe pasardhësve të tyne e ruen dhe e mbron gjithmonë dhe don që ta drejtojnë ata që Ai vetë i ka zgjedhë që të jenë zëvendës të Birit të Tij në mesin e njerëzve, duke i quejtë barij. Për këtë arsye dhe lutja e jonë e sontme nuk mundet të bajë tjetër veçse nga njena anë me i kërkue Zotit që të lindin në mesin e popullit të tij thirrje meshtarake dhe të jetës së kushtueme, prej ka do të dalin udhëheqësit në shpirt për popullin e tij, dhe nga ana e tjetër të na e dhurojnë hirin për me kenë grigjë e cila e dëgjon zanin e bariut që Ai e ka zgjedhë për me kenë sipas zemrës së tij.

Heshtje e shkurtë meditimit...

Të lutemi të gjithë bashkë...

O Zot, Jezu Krisht,
Të falënderojmë që na ke dhanë
si Bari për shpirtërat tanë
një njeri dhe jo një Engjëll.
Ndriçoje me dritën tënde,
mbushe me hirin tënd
dhe mbështete me forcën tënde.
Bëj që mungesa e suksesit mos ta shkurajojë,
dhe suktesi mos ta bëjë mendjemadh.
Na bëj të dëgjueshëm ndaj zërit të tij,
dhe jepi hirin ta dëgjojë edhe zërin tonë.
Bëje që të jetë për ne,

**mik, mësues, mjek dhe atë.
ndriçoja mendjen me ide të qarta,
me ide konkrete dhe të arritshme për t'u realizuar,
duke i dhënë atij forcën për t'i zbatuar,
dhe neve aftësinë për të bashkëpunuar.
Bëje që të na udhëheqi
me dashuri dhe shembull,
me fjalë dhe me vepra,
duke qenë për ne
pasqyrë e dashurisë tënde.
Na e jep hirin që në të, të besojmë,
të nderojmë dhe të të duam Ty.
Bëj që të shëlbohen të gjithë shpirtërat
që atij ja ke besuar.
Na shëlbo të gjithëve së bashku me të.
Amen.**

Heshtje e shkurtë meditimit

Thirrja në meshtari dhe në jetën e kushtueme përmban në vetvete një dhuratë të veçantë hyjnore, dhuratë e cila asht pjesë e planit të shëlbimit që Hyji ka për krejtë njerëzimin.

Për këtë arsye në thirrjen e përgjithshme në shejtni vërehet iniciativa e Zotit, i cili i zgjedhe disa persona në mesin e njerëzve që ta ndjekun ma prej afër Birin e tij Jezu Krishtin,

duke i shërbye në mesin e njerëzve dhe duke kenë dëshmitarë të dashnisë së tij. Në këtë mënyrë, duke ju përgjigjë thirrjes së Zotit dhe duke e pranue veprimin e Shpirtit Shejt, një numër shumë i madh priftash dhe personash të shuguruar, gjatë shekujve janë vu në shërbim të plotë të Kishës dhe të Ungjillit. Ta falënderojmë Zotin që edhe sot vazhdon me thirrë punëtorë për me punue ne vneshtën e tij, dhe që ende sot ka njerëz që e pranojnë këtë ftesë me bujari dhe dashni, duke kenë të sigurtë se po bashkëpunojnë në realizimin e planit të tij të dashnisë për të mirën e botës.

Heshtje e shkurtë meditimit

Ta lusim të gjithë bashkë Psalmin 23

**Zoti është bariu im,
asgjë nuk më mungon.
Më ushqen kullotave të gjelbra,
më prin në ujëra të qeta,
shpirtin ma përtërin.**

**Ai më prin shtigjeve të drejta
në saje të dashurisë së Emrit të vet.**

**Po edhe në kalofsha nëpër luginën e hijes së vdekjes,
s'trembem nga e keqja
sepse ti je me mua:**

**thupra jote dhe kërraba
për mua janë ngushëllim.**

**Ti ma shtron tryezën përpara
ndër sy të armiqve të mi,
me vaj erëmirë kryet ma lyen,
gotën ma mbush plot e përplot.**

**Hiri dhe mirësia do të më përcjellin
në të gjitha ditët e jetës sime,
do të banoj në shtëpinë e Zotit
derisa të jem gjallë.**

Heshtje e shkurtë meditimit dhe kangë...

Bariu i mirë kullotë dhe ushqen, shkon në kërkim të asaj që ka humbë, i njeh delet e tija dhe ata e njohin atë. Krishti asht Bariu i mirë. Ai na njeh dhe e jep jetën për ne. NA NJEH. Kjo asht shumë e randësishme për ne: Përderisa Ai na njeh, atëherë për ne asht e randësishme me e njoftë Krishtin si Bariun e mirë dhe me pa në Kishën e tij udhëheqjen e jetës sonë.

Krishti ja len në besim Pjetrit Grigjën e tij. Me njoftë Krishtin don me thanë me e njoftë dhe me e niggue zanin e tij. Kur tek burimi i ujit shkojnë disa tufa delesh përnjiherë dhe delet përzihen njana me tjetrën, por... SAPO E NIGJOJNË ZANIN E BARIUT TË TYNE që po i thërret, ndahen në vedi grup dhe nisen drejt kullotës apo drejt shtëpisë. të gjitha bashkë...

me përjashtim të ndonjenes që asht e sëmure, shurdhe ose e verbër...

Tek pusi ka shumë barij që i thërrasin të gjitha delet, dhe delet duhet me njoftë zanin e bariut mes shumë zërave të tjerë... Kena shumë zëra në botën që na rrethon të cilët na thërrasin duke na premtue TË NESËRMEN E BUKUR QË AQ SHUMË E DËSHIROJMË, por CILI ASHT ZANI I MIRË, dhe cili asht zani mashtrues?

«Unë jam Bariu i mirë».

Identikiti i shpallun prej vetë Jezusit si Bariu i Mirë, i shtyu të krishtenët e parë që ta tejkalonin pengesën hebraike që u'a ndalonte për me krijue piktura të Zotit në tokë, dhe nuk i rezistuan tundimit që ta kishin para vetes një gja të tillë, duke ba që katakombet të kishin një pamje të tillë në mure të pikturueme. Jezusi «Bariu i mirë» asht Biri që i thotë Atit: «Nuk ke dashtë ma ofrime gjanash ose kafshës, qe ku jam! Më dërgo mua». Asht samaritani mirë që ndihmon atë që ka nevojë. Asht Mësuesi që ju lanë kambët nxanësve të tij. Asht i pafajshmi që dorëzohet përpara Pilatit. Jezusi na e ofron këtë fytyrë të bariut të mirë për me na ftue që edhe na, sikurs ai vetë, ta japim jetën tonë për të tjerët. Ai asht modeli i jonë.

Të gjithë jena të thirrur për me kenë “barij të mirë” që e japin jetën e tyne për të tjerët. Po, çka don me thanë me dhanë jetën për të tjerët? Gjithçka mund të fillojnë prej gjanave të vogla të jetës së përditshme, prej veprave të mira që mund ti bajmë përditë, edhe pse mund të na kushtojnë e mund të na marrin pak kohë, energji apo edhe nerva. Duke fillue prej veprave të vogla, kena me mbërritë papritmas me u gjetë shumë të lehtësuem atëherë kur të na kërkohet një vepër e madhe.

Pra asht dhurim jetet çdo angazhim dhe çdo kohë që dhurohet,

çdo bashkëpunim dhe çdo sakrificë që shumë prej nesh bajnë në mbrendësi të bashkësisë së krishtenë, si dhe për të mirën e jetës së famullisë. E gjithë kjo quhet “aktivitet baritor”. Dhe të gjithë ne mundena me kenë, nëse e dëshirojmë një gja të tillë, pra mundena me kenë bashkëpunëtorë të aktivitetit baritor të Zotit dhe Kishës në mesin e vllazënve, dhe jo vetëm përfitues të të mirave që sjell prania e Zotit në mesin e bashkësisë.

Heshtje e shkurtë meditimit dhe kangë

**O Zot, Jezu Krisht,
Biri i Hyjit të gjallë,
Ne besojmë se në ty
banon plotësia e hyjnisë.
ti na fton të gjithëve
që ta përshkojmë rrugën tënde të shenjtërisë.
Bëj po të lutemi që të gjithë të rinjtë
të jenë në botën e sotme
dëshmitarë të pushtetit të dashurisë tënde.
Mbushi me Shpirtin tënd të forcës dhe të urtisë
që të jenë të aftë për ta zbuluar
të vërtetën e vetvetes dhe të thirrjes së tyre.
O Shëlbuesi ynë,
i dërguar prej Atit
për të na zbuluar dashurinë e tij të mëshirshme**

**bëja dhuratë Kishës tënde
të rinjtë që të jenë të gatshëm
për të ndjekur shenjtërinë tënde,
dhe për të qenë në mesin e vëllezërve,
dëshmitarë të pranisë tënde që na përtërin.
O Virgjër e Shejtë, Nëna e Shëlbuesit tonë,
na udhëhiq të sigurt në rrugën tonë
drejt Hyjit dhe drejt të afërmit.
Ti që e para i ke ruajtur fjalët e tija
në intimitetin e zemrës tënde,
na ndihmo me ndërmjetësinë tënde prej Nënë,
që dhe ne të jemi ndihmë për adoleshentët dhe të rinjtë
me qëllim që ti përgjigjen me bujari
thirrjes së Zotit tonë
që me aq shumë dashuri i pret dhe i don.
Amen.**

Heshtje e shkurtë meditimi dhe këngë...

Unë jam Bariu: Titulli ma i çuditshëm që Jezusi i jep vetvetes. Por asht bariu i cili plot me guxim lufton me kryq kundër ujqërve.

Unë jam bariu i bukur, shkruhet në origjinalin në greqisht. Nga kjo e kuptojmë se bukuria e Tij për ne asht bashkim dhe forcë.

Por lind pyetja: Pse asht Jezusi Bariu i bukur, dhe me çka na detyron për me i shkue mbrapa? Ai na bind me një fjalë që e përdorë pesë herë rresht në këtë shëmbëlltyrë: Unë e jap jetën teme; JETËN TEME PËR JETËN TANDE. Ky asht urdhni që ka marrë prej Atit tem, urdhni që unë zbatoj dhe që e ban të bukur jetën tande: dhurimi im.

Bariu i mirë dhe i bukur ka guxim të madh, sepse delet janë të tijat dhe nuk asht si rrogtarët. Për Krishtin të gjitha delet kanë randësi, një për një e të nëntëdhjetë e nëntat bashkë. Njeriu i intereson Zotit, dhe mund të tham me plot bindje se Zoti e konsideron njeriun ma të randësishëm se vetveten, sepse për asht i gatshëm me e dhanë edhe jetën e vet.

“O Zot, po a nuk je në marak se jena duke u mbytë në ujë”?

Kjo ishte britma e apostujve një natë kur ishin në mes të furtunës në det. Dhe Zoti përgjigjet duke e qetsue detin e duke ju thanë me këtë se, -patjetër që jam në marak gjithmonë për ju. Për mu ka shumë randësi jeta e jote, ti je shumë i randësishëm për mue. Këtë gja ja përsëritë secilit prej nesh: për mu janë të randësishëm edhe zogjtë e qiellit, por ju vleni ma shumë se krejtë zogjtë e qiellës. Për mue kanë randësi edhe lulet e fushës, por vleni ma shumë se krejtë lulet bashkë. Unë e njoh thotë Zoti, numrin e flokëve që ke, por ta dish se e njoh edhe krejt frikën që ti e mban në zemrën tande.

Ky asht urdhni që kam marrë prej Atit: jeta e jeme asht dhuratë. Për me kenë mirë me vetveten njeriu duhet me dhanë gjithmonë. Bariu nuk mund të jetë mirë dhe i qetë në kjoftë se delet e tija nuk janë mirë. Zoti në të cilin na besojmë nuk mundet me ndejtë i qetë në qiell, por zbret dhe futet në historinë tonë. Një i krishtenë nuk mundet me kenë mirë dhe i qetë, derisa mos të jetë mirë dhe i qetë edhe vëllau e motra e vet.

Prej kësaj logjike e merr forcën dhe zanafillën aventura e të gjithë atyne që si Bariu i mirë janë në kërkim të vazhdueshëm të mundësisë për me e dhurue jetën e tyne, sepse asht mënyra e vetme për me gjetë plotësinë e jetës dhe jetën tonë me e ba të bukur.

Heshtje e shkurtë meditimit

Të lutemi të gjithë bashkë (Charles de Foucauld)

O Zoti im, Jezu Krisht.

Dëshiroj të dua të gjithë ata që Ti i do,

Dëshiroj të dua së bashku me Ty,

vullnesën e Atit për botën.

Dëshiroj që asgjë të mos mund ta ndajë,

zemrën time prej zemrës tënde.

Gjithçka që do Ti,

atë dua edhe unë.

Gjithçka që dëshiron Ti,

atë e dëshiroj edhe unë.

O Hyji im, po ta jap zemrën time,

O Hyji im, po ta dhuroj zemrën time,

dhe bashkë me zemrën tënde ofroja Atit,

si një diçka që të përket Ty

dhe që mund ta ofrosh,

sepse tashmë zemra ime të përket Ty.

Amen.

Heshtje e shkurtë meditimi dhe kangë...

Ati ynë...

Prej predikimit të Papës Françesku me 28 mars 2013.

“Veshjet e shejta të Kryepriftit janë të pasura me simbole; një prej tyre asht simboli i emnave të të bijve të Izraelit të shkruem përmbi gurët e çmueshëm të cilët zbukurojnë veshjen e tij liturgjike dhe prej kësaj mandej vjen edhe kazula e jonë që përdorim në Meshë... Kjo don me thanë se meshtari kremton duke mbajtë përmbi shpatullat e tija krejt popullin që i asht besue në lutjet e tija duke i mbajtë emnat e tyre të ngulun në zemër. Kur ta veshim kazulën tonë të përvujtë mendoj se na ban mirë me ndie përmbi shpatullat tona dhe në zemrën tonë peshën edhe fytyrën e popullit tonë besnik, të shejtënve tanë dhe të martirëve tanë, që në këtë kohë janë të shumtë!”

Për ta përjetësue misterin shëlbues të Krishtit në shekuj, deri në kthimin e lumnishëm të Zotit, janë caktue prej vetë Tij priftat. Në kremtimin Eukaristik asht Krishti vetë që vepron në ata që Ai i ka zgjedhë si shërbëtorë të tij. Vetëdija se jena të shëlbuem prej dashnisë së Krishtit, dhe se çdo Meshë e Shejtë na sjell praninë e Tij të mëshirshme, nuk ka sesi të veprojë ndryshe veçse të nxisë në shërbëtorët e tij besimin në lëshim e plotë të jetës në duart e Atij që ka dhanë jetën për ne. Të besoh në Zotin dhe ta pranosh dhuratën e Tij, don me thanë me i’a besue jetën tande plotësisht planit të tij shëlbues: “Nuk jeni ju që më keni zgjedhë mua, por unë ju kam zgjedhë ju dhe ju kam caktue që të shkoni e të jepni fryt dhe fryti i juaj të qëndrojnë” (Gjn 15,16).

Të lutemi të gjithë bashkë...

Lutje për thirrjet meshtarake

**Të dëgjueshëm ndaj Fjalës tënde,
të kërkojmë o Zot:**

“Dërgo punëtorë në të korrat e tua”.

Në lutjen tonë,

Ti e sheh nevojën për meshtarë të rinj.

**Dhuroju të rinjve tanë,
një shpirt të hapur dhe plot guxim,
që ta pranojnë ftesën tënde.**

**Foli me zemrën Tënde zemrës së tyre
dhe thirri për emër.**

**Në sajë të hirit tënd le të jenë,
të qetë, të lirë dhe të fortë;
të lidhur me një dashuri të vetme,
të pastër dhe besnike.**

**Të jenë apostuj të apasionuar të Mbretërisë tënde,
kundërshtarë të hipokrizisë
dhe heronj të përvujtë të Shpirtit.**

**Edhe një gjë tjetër të kërkojmë, o Zot:
bashkë me të “thirrurit” të mos mungojnë
edhe “ata që i thirrin”;**

**ata që në emrin tënd i ftojnë,
i këshillojnë, i shoqërojnë dhe i udhëheqin.
Qofshin famullitë tona shenja të bekimit tënd
dhe hapësira të denja**

në të cilat mësohet dhe shpallet besimi.

Për seminaristët tonë të kërkojmë

**qëndresë në zgjedhjen e tyre:
bëj që të rriten çdo ditë në shejtëri dhe në dije.
Ata që tashmë e jetojnë thirrjen tënde,
Ipushkvin tonë dhe Meshtarët tanë
- forcoji në punën e tyre apostolike,
mbroji në ankthet e tyre,
ruaji në vetminë e tyre,
dhe forcoji në besnikëri.
Me ndërmjetësinë e Nënës tënde të Shejtë,
po ta besojmë ty, o Jezus, lutjen tonë.
Lindshin, o Zot, prej lutjeve tona,
thirrjet meshtarake
për të cilat aq shumë kemi nevojë. Amen.**

Heshtje e shkurtë dhe kanga e Sakramendit

**Sakramend pra kaq t'madhnuem,
le t'adhrojmë me ftyrë për dhe,
edhe dokja e motit t'shkuem
t'ia lshojë rendin sjelljes s're;
N' çka s'mbrrin mendja me kuptue,
Ndihmë t'na bahet shejtja fe.**

**Atit, Birit sot përhera
u kjoftë kanga plot hare,
jetë pushtet u kjoftë e ndera
bekue kjoshin n'qiell e n'dhe;
Shpirti rrjedhë dy vehtjesh tjera,
njai kjoftë lavdi i shejtes fe. Amen.**

- Bukën qiellore ua dha atyre.

- Që në vetvete ka çdo shije.

Të lutemi. O Zot Jezu Krisht, që në Sakramendin e mrekullueshëm të Eukaristisë na ke lanë përkujtimin e Pashkëve të tua, ban që ta adhurojmë me fe të gjallë misterin e shejtë të Korpit dhe Gjakut tand, për të shijue në ne të mirat e shëlbimit tand. Ti që jeton e mbretnon në shekuj të shekujve. Amen.

Bekimi me të Shejtnueshmin Sakramend

Litanitë e Emnit të Zotit

Qoftë bekuar Zoti.

Qoftë bekuar emri i shejtë i Tij.

Qoftë bekuar Jezu Krishti,

Zot i vërtetë e njeri i vërtetë.

Qoftë bekuar emri Jezus.

Qoftë bekuar zemra tejet e shejtë e Tij.

Qoftë bekuar gjaku tejet shejtë i Tij.

Qoftë bekuar Jezu Krishti

në Sakramendin tejet shejtë të Elterit.

Qoftë bekuar Shpirti Shejtë ngushëllues.

Qoftë bekuar e madhnuemja Nëna e TenZot,

Virgjëra Mari.

Qoftë bekuar të zanët e shejtë e të panjollë të saj.

Qoftë bekuar të ngjiturit e lumtur të saj në qiell.

Qoftë bekuar emri i Zojës Virgjër dhe Nënë.

Qoftë bekuar shejti Jozef, fati tejet i pastër i saj.

Qoftë bekuar Zoti ndër engjëjt dhe shejtnit e vet.

Kanga përfundimtare.